



**REPUBLIKA E KOSOVËS**  
REPUBLIKA KOSOVA – REPUBLIC OF KOSOVO  
GJYKATA E APELIT PRISHTINË

Numri i lëndës: 2023:138954  
Datë: 16.10.2024  
Numri i dokumentit: 06302543

**Ac.nr.1197/2024**

**GJYKATA E APELIT E KOSOVËS NË PRISHTINË, Departamenti i Përgjithshëm-Divizioni Civil**, në kolegjin e përbërë nga gjyqtarët: Bujar Muzaqi, kryetar i kolegjit, Lumni Sallauka dhe Faton Ademi, anëtar të kolegjit, në çështjen juridike kontestimore të paditësve N.H, me numër personal ..., N.Ç-A. me numër personal ..., B.V me numër personal ... dhe C.K me numër personal ..., që të gjithë nga Prizreni, të cilët me autorizim i përfaqësojnë N.M., dhe D.Sh., avokatë nga Prizreni, kundër të paditurës Komuna e Prizrenit, Drejtoria Komunale e Arsimit, të cilën me autorizim e përfaqëson Vlora Isufi Xhoxhaj, në çështjen për shkak të kompensimit të shujtave për ditët në punë, duke vendosur sipas ankesës së të paditurës të parashtruar kundër aktgjykimit të Gjykatës Themelore në Prizren, Departamenti i Përgjithshëm, C.nr.2214/2023 datë 02.11.2023, në seancën e kolegjit të mbajtur me datë 15.10.2024, mori këtë:

**A K T G J Y K I M**

**REFUZOHET e pathemeltë** ankesa e të paditurës Komuna e Prizrenit - Drejtoria Komunale e Arsimit në Prizren, ndërsa aktgjykimi i Gjykatës Themelore në Prizren, Departamenti i Përgjithshëm, C.nr.2214/2023 datë 02.11.2023, **VËRTETOHET**.

**A r s y e t i m**

Gjykata e shkallës së parë, me aktgjykimin e atakuar C.nr.2214/2023 datë 02.11.2023, ndër të tjera ka vendosur si vijon:

**“... I. APROVOHET** kërkesëpadia e paditësve N.H, N.Ç-A., B.V dhe C.K, që të gjithë nga Prizreni, **në tërësi si e bazuar**.

**II. DETYROHET** e paditura, Komuna e Prizrenit, Drejtoria Komunale e Arsimit, që paditësve në emër të shujtave ditore, ti paguaj shumat si në vijim:

- i. *Paditësit N.H, nga Prizreni, në emër të shujtave ditore, për 138 ditë pune (nga data 01.01.2022, deri me datën 21.11.2022), të paguaj shumën prej nga 2 (dy) euro në ditë, apo shumën e përgjithshme prej dyqind e shtatëdhjetë e gjashtë euro (276.00 €);*
- ii. *Paditëses N.Ç-A., nga Prizreni, në emër të shujtave ditore, për 138 ditë pune (nga data 01.01.2022, deri me datën 21.11.2022), të paguaj shumën prej nga 2 (dy) euro në ditë, apo shumën e përgjithshme prej dyqind e shtatëdhjetë e gjashtë euro (276.00 €);*
- iii. *Paditëses B.V, nga Prizreni, në emër të shujtave ditore, për 138 ditë pune (nga data 01.01.2022, deri me datën 21.11.2022), të paguaj shumën prej nga 2 (dy) euro në ditë, apo shumën e përgjithshme prej dyqind e shtatëdhjetë e gjashtë euro (276.00 €);*
- iv. *Paditëses C.K, nga Prizreni, në emër të shujtave ditore, për 138 ditë pune (nga data 01.01.2022, deri me datën 21.11.2022), të paguaj shumën prej nga 2 (dy) euro në ditë, apo shumën e përgjithshme prej dyqind e shtatëdhjetë e gjashtë euro (276.00 €);*

*-të gjitha këto me kamatë ligjore prej 8% në nivel vjetor, për secilin paditës e cila fillon të rrjedhë nga data e paraqitjes së padisë 21.06.2023, e deri në pagesën definitive, të gjitha këto në afat prej 7 ditësh, pas pranimit të këtij aktgjykimi, nën kërcënim të përmbarrimit të detyrueshëm.*

**III. DETYROHET** e paditura që paditësve t'ia kompensoj shpenzimet e procedurës kontestimore në shumë prej **dyqindëtdhjetë euro (280.00€)**, në afat prej 7 ditësh nga pranimi i këtij aktgjykimi, nën kërcënimin e përmbarrimit të detyrueshëm...”.

Kundër këtij aktgjykimi, brenda afatit ligjor ka paraqitur ankesë përfaqësuesi i autorizuar i të paditurës, për shkak të shkeljes thelbësore të dispozitave të procedurës kontestimore, konstatimit të gabuar dhe jo të plotë të gjendjes faktike dhe zbatimit të gabuar të së drejtës materiale, me propozim që të aprovohet ankesa e të paditurës si e bazuar dhe të prishet aktgjykimi, dhe të hedhet poshtë padia e paditësit, të ndryshohet ose të prishet aktgjykim dhe të kthehet në rivendosje në Gjykatën e shkallës së parë.

Përgjigje në ankesë kanë paraqitur paditësit me propozim që të refuzohet ankesa e të paditurës dhe të vërtetohet aktgjykimi i atakuar.

Gjykata e Apelit si gjykatë e shkallës së dytë, pas vlerësimit të pretendimeve ankimore lidhur me aktgjykimin e atakuar, në mbështetje të dispozitës së nenit 194, 195 dhe 200 të Ligjit për Procedurën Kontestimore (LPK), ka gjetur se:

**-Ankesa e të paditurës është e pathemeltë.**

Nga shkresat e lëndës konstatohet se paditësja, me datë 21.06.2023, kanë ushtruar padi për kompensimin e shujtave ditore, kundër të paditurës Komuna e Prizrenit - Drejtoria Komunale për Arsim në Prizren.

Gjykata e shkallës së parë me datë 02.11.2023, ka nxjerrë aktgjykim C.nr.2214/2023 datë 02.11.2023, me të cilin ka vendosur që të aprovet e bazuar kërkesëpadia e paditësit, duke vendosur më decidivisht si në dispozitiv të aktgjykimit të atakuar.

Gjykata e shkallës së parë aktgjykimin e atakuar e ka arsyetuar si vijon: “...Gjykata gjen se në rastin në fjalë zbatohen dispozitat e Kontratës Kolektive të Arsimit në Kosovë, me nr.01/B, nr. prot. 105, e dates 22.01.2021, të nënshkruar në mes të Ministrisë së Arsimit, Shkencës dhe Teknologjisë dhe Sindikatës së Bashkuar të Arsimit, Shkencës dhe Kulturës, e cila ka hyrë në fuqi me datë 22.01.2021. Me nenin 35 par.7, të Kontratës Kolektive të Arsimit, nr.01/B, nr. prot. 105, e datës 22.01.2021, është përcaktuar e drejta e punëtorëve në kompensimin e shujtave dhe atë “Të punësuarve (antarë të SBAShK-ut), u sigurohet kompensim për ushqim gjatë punës, për ditët e pranisë në punë. Vlera e kompensimit të shpenzimeve të ushqimit në punë, për një ditë pune, është dy euro për të punësuarit të cilët kanë marrëdhënie pune primare në institucionet arsimore...”. Në rastin konkret gjykata gjeti se e paditura ka pasur për detyrim që paditësve si punëtorë të arsimit-mësimdhënës, t’ia paguaj kompensimin për shujtat ditore, konform detyrimeve që rrjedhin nga Kontratata Kolektive, e në kuptim të Nenit 55 par.1 dhe 2 të Ligjit të Punës. Rrjedhimisht lidhur me kompensimin e shujtave ditore për paditësit N.H, N.Ç-A., B.V dhe C.K, të gjithë nga Prizreni, për secilin nga ta kërkesa është bërë e arritshme për 138 ditë pune, përkatësisht për periudhën nga data 01.01.2022 e deri me datë 21.11.2022, apo shuma e përgjithshme për secilin nga ta prej 276.00 (dyqind e shtatëdhjetë e gjashtë) euro...”.

Gjykata e Apelit e aprovon vlerësimin juridik të Gjykatës së shkallës së parë si të rregullt dhe të ligjshëm sa i përket vendosjes si në dispozitiv të aktgjykimit, për arsye se aktgjykimi i atakuar nuk është përfshirë me shkelje thelbësore të dispozitave të procedurës kontestimore, vërtetim të gabuar dhe jo të plotë të gjendjes faktike si dhe nuk ka shkelje nga neni 182 par.2, pika b), g), j), k) dhe m), të Ligjit nr.3/L-006 për procedurën kontestimore dhe rrjedhimisht nuk ka aplikim të gabuar të së drejtës materiale, për të cilat gjykata kujdeset sipas detyrës zyrtare.

Gjykata e Apelit vlerëson se gjykata e shkallës së parë në këtë procedurë kontestimore drejt e ka vërtetuar gjendjen faktike, dhe atë se mes palëve nuk rezulton të jetë kontestues fakti se paditësit janë në marrëdhënie pune tek e paditura, përkatësisht janë mësimdhënës pranë SHFMU “Emin Duraku” në Prizren. Nga vërtetimi i datës 19.10.2023, të lëshuar nga drejtori i shkollës të SHFMU “Emin Duraku” në Prizren, gjykata vërtetoi faktin se paditësit N.H, N.Ç-A., B.V dhe C.K, që të gjithë nga Prizreni, janë në marrëdhënie pune-mësimdhënës pranë kësaj shkolle dhe të njëjtit për vitin 2022, dhe atë nga data 01.01.2022 e deri me datë 21.11.2022, kanë punuar gjithsej 138 ditë pune, gjendje faktike kjo e vërtetuar në mënyrë të drejtë dhe të plotë.

Lidhur me shumën e kompensimit të ushqimit në punë, Gjykata e shkallës së parë është bazuar në dispozitën e nenit 35 par. 7 të Kontratës Kolektive të Arsimit në Kosovë, në të cilin nen ndër të tjera thuhet se: “...Të punësuarve, u sigurohet kompensim për ushqim gjatë punës, për ditët e pranisë në punë. Vlera e kompensimit të shpenzimit të ushqimit në punë, për një ditë pune, është 2 (dy) euro për të punësuarit që kanë marrëdhënien e punës primare në institucionet arsimore...”, e cila Kontratë është lidhur dhe është nënshkruar nga Ministria e Arsimit, Shkencës,

dhe Teknologjisë, si dhe Sindikata e Bashkuar e Arsimit, Shkencës, dhe Kulturës e cila kontratë ka hyrë në fuqi me datë 22.01.2021, andaj mbi bazën e të lartcekurave, kjo gjykatë gjeti se gjykata e shkallës së parë drejtë ka vendosur kur e ka aprovuar kërkesëpadinë e paditësit si të bazuar, për çka edhe vendosi që të njëjtin ta vërtetoj sikurse në dispozitivin e këtij aktgjykimi.

Nuk qëndrojnë pretendimet ankimore të të autorizuarit të paditurës se aktgjykimi është përfshirë në shkelje thelbësore të dispozitave të procedurës kontestimore nga neni 182 paragrafi 2 pika n), e LPK-së. Sipas vlerësimit të Gjykatës së Apelit, dispozitivi i aktgjykimit të atakuar është mjaft i qartë, e në përputhje të plotë me arsyet e aktgjykimit, duke qenë kështu në harmoni logjike dhe juridike me arsyetimin. Gjykata ka arsyetuar të gjitha faktet me peshë vendimtare për themelësinë e kërkesëpadisë e në lidhshmëri me këtë ka arsyetuar mënyrën se si janë vërtetuar faktet përveç atyre jo kontestuese e gjithashtu edhe mënyrën se si i ka vlerësuar provat për secilin fakt të provuar.

Nuk qëndrojnë pretendimet ankimore të të paditurës se gjykata e shkallës së parë gabimisht ka aplikuar të drejtën materiale kur ka gjykuar për shpenzimet e ushqimit në punë, për arsye se: Me nenin 90 paragrafi 1 të Ligjit të Punës 03/L-212 i datës 01.11.2010, përcaktohet se: *”Marrëveshja Kolektive mund të lidhet ndërmjet : a) organizatës së punëdhënësve ose përfaqësuesit të tij dhe b) organizatës së të punësuarve ose kur nuk ekzistojnë organizata, marrëveshjen mund ta lidhin edhe përfaqësuesit e të punësuarve”*. Me paragrafin 2 të këtij neni përcaktohet se: *“Marrëveshja Kolektive mund të lidhet: a) në nivel të vendit, b) në nivel të degës dhe c) në nivel të ndërmarrjes”*. Me paragrafin 3 të këtij neni përcaktohet se: *“Marrëveshja Kolektive duhet të jetë në formë të shkruar, në gjuhën zyrtare të Republikës së Kosovës”*. Me paragrafin 5 përcaktohet se: *“Marrëveshja Kolektive vlen për ata punëdhënës dhe punëmarrës të cilët marrin për sipër detyrimet e përcaktuara me marrëveshjen e tillë kolektive”*.

Gjykata e Apelit, mori parasysh pretendimin ankimor të të paditurës lidhur me faktin se Kontrata Kolektive e Arsimit nuk është obligative për të paditurën, për arsye se nuk janë përmbushur kushtet e parapara të kësaj Kontrate, meqenëse nënshkruesit e kësaj kontrate siç janë MASHT-i, SBASHK-u dhe Ministria e Financave nuk janë angazhuar asnjëherë për zbatimin e dispozitave që janë implikime financiare. Lidhur me këto pretendime, Gjykata e Apelit vlerëson se referuar dispozitave të Kontratës Kolektive të Arsimit në Kosovë, rrjedh se obligimi për përmbushjen e të drejtave të të punësuarve të parapara me këtë Kontratë, përfshirë të drejtën për kompensim të ushqimit, i takon pikërisht punëdhënësit, që në rastin konkret i bie të jetë Komuna e Prizrenit – Drejtoria Komunale e Arsimit. Në këtë pikëpamje, çfarëdo vështirësie që i atribuohet implikimeve financiare lidhur me zbatimin e kësaj Kontrate, nuk e liron të paditurën nga përgjegjësia për përmbushjen e obligimit në raport me kërkesën e paditëses, gjegjësisht nuk paraqet bazë që kërkesëpadia të trajtohet si e pa themeltë, ndërsa në nenin 2 par.1.2 të Kontratës Kolektive e Arsimit në Kosovë të datës 22.01.2021, ndër të tjera thuhet se: *“Dispozitat e kësaj Kontrate Kolektive janë të zbatueshme për të gjithë punëdhënësit në sektorin e Arsimit, (Komunat - DKA, KD të Universiteteve e institucioneve të arsimit të lartë, MASHT-in etj.) në sektorin publik dhe institucionet edukativo-arsimore private në mbarë territorin e Republikës së Kosovës...”*, ndaj detyrimi për zbatimin e kësaj kontrate ka fuqinë ligjore.

Janë vlerësuar pretendimet ankimore të të paditurës, por Gjykata e Apelit nuk ka gjetur se aktgjykimi i atakuar është i përfshirë në ndonjë shkelje, prandaj të gjitha pretendimet janë vlerësuar si të pabazuara.

Nga të lartë cekurat e në mbështetje të dispozitës së nenit 195.1 pika d), lidhur me nenin 200, të Ligjit nr.3/L-006 për procedurën kontestimore, është vendosur si në dispozitiv të këtij aktgjykimi.

**GJYKATA E APELIT E KOSOVËS NË PRISHTINË**  
**Departamenti i Përgjithshëm-Divizioni Civil**  
**Ac.nr.1197/2024 datë 15.10.2024**

**Kryetari i kolegjit - gjyqtari,**  
**Bujar Muzaqi**